

**PEMBERITAHUAN PERTANYAAN DEWAN RAKYAT**

**PERTANYAAN : BUKAN JAWAB LISAN**

**DARIPADA : DATUK JUMAT BIN IDRIS [ SEPANGGAR ]**

**SOALAN :**

**Datuk Jumat Bin Idris [ Sepanggar ] minta MENTERI PERUSAHAAN PERLADANGAN DAN KOMODITI menyatakan adakah pihak Kementerian mempunyai perancangan untuk memperluaskan dan membantu penanam getah memandangkan meningkatnya harga getah pada masa ini.**

## **JAWAPAN:**

Untuk makluman Ahli Yang Berhormat, harga getah seperti lain-lain komoditi adalah diperdagangkan di peringkat antarabangsa dan harga pasaran adalah ditentukan oleh kuasa penawaran dan permintaan. Selain itu, harga getah juga terdedah kepada ketidakstabilan harga dalam keadaan di mana penawaran melebihi permintaan. Oleh yang demikian, perluasan tanaman getah perlu mengambil kira prospek jangka masa panjang dan bukannya bergantung kepada harga semasa. Ini adalah memandangkan tanaman getah memerlukan hampir lima (5) tahun sebelum ianya boleh ditoreh dan berhasil.

Pada masa ini, bantuan tanaman semula dan tanam baru getah dilaksanakan di bawah program Bidang Ekonomi Utama Negara (NKEA). Kerajaan menyediakan geran bantuan tanam semula dan baru getah sebanyak RM14,000 sehektar di Sabah, RM13,500 sehektar di Sarawak dan RM 9,230 sehektar di Semenanjung. Bantuan ini adalah dalam bentuk benih klon getah yang berkualiti tinggi, baja, racun rumpai dan bakinya dalam bentuk tunai.

Mulai tahun 2012 hingga 2016, sebanyak 153,387 hektar kawasan pokok getah tua telah ditanam semula dengan klon-klon getah baru yang berhasil tinggi di samping 53,690 hektar kawasan baru getah telah dibuka di seluruh negara. Dalam tempoh tersebut, Kerajaan telah membelanjakan sejumlah RM1.2 billion untuk melaksanakan kedua-dua aktiviti tersebut.

Bagi tahun 2017, sasaran untuk aktiviti tanam baru dan tanam semula di Sabah dan Sarawak adalah sebanyak 12,134 hektar dengan peruntukan berjumlah RM130 juta. Dari jumlah ini, sebanyak RM50 juta disediakan

bagi program tanam getah di Sabah dan RM80 juta di Sarawak. Aktiviti tanam semula di Sabah berjumlah 952 hektar manakala aktiviti tanam baru adalah berjumlah 1,182 hektar. Di Sarawak, aktiviti tanam baru adalah berjumlah 10,000 hektar.

Kementerian akan meneruskan usaha-usaha untuk membantu para penanam getah di mana hampir 93% daripada tanaman adalah diusahakan oleh golongan pekebun kecil. Langkah ini akan membolehkan golongan ini menikmati pendapatan yang stabil di samping menyumbang kepada peningkatan pendapatan penduduk luar bandar.

Sekian, terima kasih.